

Kedotaman Kidji ajotineakopiotisoan

Ka nikanitc kashka eadji ogimakaniwanig kopek aki kiwidamakowa kidinendakosiwiniwa

Kiwi ajodineakopiodisom koni kiwi adji ogimakem na?

Wi ajotineakopiodisom, panima kiga masinasonan ashitc kiga kicponepian oowe apitc adji ogimakaniwag :

1- kidji 18 tasopionesian iji icpimig; 2- kanata kidji ijitipenidakosian 3-nikotwasokisis inikig etanisian kopeg aki

Ki masinasonan na kaiji adji ogimakaniwag?

Kika kinda kakwete kapidjinijamagoan masinaigan kimigiwamigag epidji masinasonan.

Adi ketodag awiag kidji adotc owison eadji ogimakaniwag?

Kata ija ojipiikewikiwamig kaiji atekin wisonan enda kakwetetc kidji ojipiwakaniwitc koni kidji minopidjicate kiwison. Kidjinawemagan koni kiwidikemagan kegwan kawidji tajikematc kataki kakwete kin odji.

Panima nijin atwadiwinag kiga ijiwinag emasinasonan iima enda kakwetean kidji masinasowan, kicpin eka aiawatc kawin kaka otapinikatesinon kiwison.

1 Nitam aawe kitatwadiwin

Nidam kiwison kata masinate ashitc anapitc kanitawikian.

Tapishkoc oowe keijinakwag: Kisikataso masinaigan, kitakosi atwadiwin ,atwadiwin kanata eiji tipenidakosian (passeport ijinikate).

2 Nijin aawe kitatwadiwin

Nijin dash panima kata nakwan kiwison enasinateg kimikiwam mikana kaiji dajikean.

Tapickoc oowe keijinakwag: ki pimpiso masinaigan, koni kitanomwepiwapiko masinaigan kekwan kiwasakonenitamagan masinaigan.

Adi iima eiji takwag ojibiikewikiwam eiji nanada koki kikenidjicatekin masinaiganan?

Eiji takwag, anapitc ekijikag etasotipaiganeag ejètég ojibiikewikiwam enanada koki kikenidjicateg enakwan kapidjinijamakoweg kimikiwamiwakag masinaigan.

Oowe dash kiapatc kiadjikate?

Ickwa kipsisig kidjiki mikiweapan kiwison ewi kakwetean kidji adjikateg kiwison koni kidji minopiikateg ewi adji ogimakaniwag? Awinda kakweten kaiji takwag ojipiikewikiwam kawi iji adji ogimakaniwag. Kika widamako adi keijishaian ashitc anapitc keki ijinda kikenidjicateg. Apitc dash iuwe odji ijseg aawe eta kewi ajotineakopiotisotc kata kinda kakwete.

Oowe kidji kekon ! Ekinda adoan kiwison kaiji adji ogimakaniwag kawin win kikaki adji okimakesi ii apitc ekijikag, anish inatèg apitc ekijikag kidjinda adji ogimakean iima ojibiikewikiwamig ashitc iuwe ekijikag eadji ogimakaniwag.

Adi iima ashitc anapitc kenta adji ogimakeeg ?

Kika pidjinijamakom atwadiwin emikowasomikoek anapitc ashitc adi iima keijinda ajotineakopiotisoeg koni kidjinda adji ogimakeeg. Apitc iuwe ekijikag eadji ogimakaniwag ki kaminikom adi iima keijaieg, apitc dash ejètég shakitadjin ashitc apita ekicepawashig pinishi nianeniwin eonakoshig (9h30 pinishi 20h00). Kika kinda ajotineakopiotisonan koni kenta ogimake apwamashi ijseg kidji adji ogimakaniwag. Masinate anapitc ekijikag etasotipaiganeag ejètég ojipiikewikiwam kidjinda adji okimakeeg eki pidjinishamakoeg masinaigan emikwaasomikoeg kimikiwamiwakag.

Oshki kekon: nanokajig inikig kiadjikate kidjinda adji ogimakeeg

Kawin win ii ekijikag kainadjikateg kikashkidosin kidjinda adji ogimakeeg? Nanokajig dash inikig ki adjikate kidjinda adji ogimakean kaiji atèg ojibiikewikiwamig kiwison.

Wikidenidameg ii apitc ekijikag ashitc ketasotipaiganeag kejètég kidjinda adji ogimakeeg nda kanawabadamog ka masinateseg ojibiikanikag koni enewesidjikeg kaiji widamakonaniwag ojibiikewikiwamig.

Adi kedotaman enda adji ogimakean?

- 1 nitam** Mikimowinigi ojipiikewikiwamigi kejjinda adji ogimakean oka kanawapadanawa epidji takwag kiwison.
- 2 nijin** Ki mikiwe kiwison ashitc kitatotawin kiwapataiwe emasinawon.
- 3 nisin** Kika minig emasinawatc kawi ogimawiwatc owisoniwa.
- 4 niwin** Kika ija iima kejjinda okimakean koni kejjinda ajotinekopiotoisoan kidji oninatc awenen ka onapatc kidji ogimawitc panima dash kin nishike kidji onamatc kaiji wawiepiikateg kidji ajotinekopioman panima kika apadjidon iwe ojipiikanatig keminikoan.
- 5 nanan** Ickwa ogimakean koni ickwa ajotinekopiotoisoan kika kokinda apinan wisiniwakanikag.
- 6 niktowadjin** Kin tipinawe kikanda pidasikwewepinan mitikowajikag ka onamatc keogimawitc eki ajotinekopioman pejik wison.

Oowe kidji kekon ! winda adji ogimakean panima kika mikiwe kidji kikenimikoan pejig atwadiwin oowe:

- 1_ kitakosi atwadiwin;
- 2_ ki pimpiso masinaigan atwadiwin;
- 3_ passeport ijinikaso atwadiwin kanada eiji tipenitakosian;
- 4_ kitanishinabe atwadiwin;
- 5_ atwadiwin kiwisowin emasinateg forces canadiennes ijinikaso.

Eka kackidoan dash kidji pimosean ?

Kicpin eka kackidoan kidji sakaman kidji papamosean odji eakosian kataki pishaniwan kimikiwamikag kidjiki ogimakean koni kidji ki ajotinekopiotoisoan apitc adji ogimakaniwag. Ii dash odji ijiseg panima kata ojipiikaniwan ekakwedjimakaniowatc ikiwe ka mikitamowatc eadji ogimakaniwanig pejotc katakwag ojipiikewikiwam. Kicpin winda wenidaman kidji adji ogimakean kimikiwamikag igotc kikaki widamako adi kedotaman kidji ogimakean kimikiwamikag kika aiamia kaniganitc eadji ogimakaniwanig.

Awenen kamikidag eadji ogimakaniwanig ooma kopeg aki?

Mi aawe kanikanitc eadji ogimakaniwanig ooma kopeg, iwe mikimowin kakina awiag inenidakosi kidji adji ogimaketc.

Wasag na kita tajikem?

Ki mikidjikate kidjiki adji ogimakewatc ikiwe wasag katakwakin nadam anishinabewakin.

Liwe dash kamikidjicateg oka kishkidonawa oowe:

- fax okaki apadjitonawa kidjiki kakwetewatc wiminopidjicatekin wisonan migwatc ijinakwag enanada koki kikenidjicategin
- kikaki ijinishaian adji ogimakean egi ajotinekopiotoisoan
- kikaki widamake fax eapadjitoan wi adoan kiwison kidji ijitaian koni ewi okimasiwian.

Pianinweg kidji kikenitakwag kishpin kitanishinabewakiwa epidji minoseg ka ijdjicateg kidji dodjicateg koni kidjinda kikenidameg iima web kaijinateg ijimasinate kidjinda kanawapadaman «wasag katajikewatc awiakog »

Kekon na kiwi kakwetem ?

- Kamasinateseg ojipiikan (ordinateur kaijinateg) mi iima iji kanawapadamog kanikanitc eadji ogimakaniwanig oowe Inasinate: www.electionsquebec.qc.ca.
- Inewesidjiken kanikanitc eadji ogimakaniwanig kawin mamakatc kika kijikasin mi oowe enasinateg (1 888 353-2846) 1 888 ÉLECTION.
- Ojipiama kanikanitc eadji ogimakaniwanig kamasinatesek ojipiikan mi oowe inasinateg : info@electionsquebec.qc.ca.